



## **Timor-Leste: Komite CEDAW ONU ejize autoridade sira atu asegura reparasaun kompletu ba vítima sira hosi violasaun seksual sira iha konfliktu**

Espesialista ida hosi Komite ONU hatoo nia preukupasaun kona-ba kontinuasaun fallansu hosi Governu Timor-Leste atu adopta lei hodi asegura reparasaun kompletu ba sobreviventes hosi violensia seksual no forma violensia seksual sira seluk ne'ebé akontese durante okupasaun Indoneziu (1975-1999) no referendun ba independensia tinan 1999.

Iha 11 Novembru 2015, Komite ONU kona-ba Eliminasau Diskriminasaun Kontra Feto, orgaun ida ne'ebé enkaregadu atu reeve implementasaun Konvensaun ONU kona-ba Eliminasau Forma Diskriminasaun Hotu-Hotu Kontra Feto (CEDAW), lori preukupasaun lubuk ida ba atensaun representante Governu Timor-Leste durante konsiderasaun ba relatoriu estadu iha sesaun ba dala 62 iha Geneva. Iha Komite ninia konkluzau observasaun, ne'ebé hasai iha 20 Novembru 2015, Komite expresa preukupasaun oioin iha areas sira ne'ebé Timor-Leste falla atu kumpri ninia obligasaun tuir Konvensaun.

Amnesty International no Judicial System Monitoring Programme (JSMP) kongratula CEDAW ninia deskobrementu sira no involvimentu konstrutivu hosi Governu Timor-Leste durante revizaun ne'e. Komite husu ba Governu Timor-Leste atu hola pasu sira nesesariu hotu-hotu atu asegura katak Komite ninia rekomendasaun sira implementa duni, nune'e lei sira, politika no pratika sira hotu aliña ho obligasaun tuir Konvensaun.

Amnesty International apresenta submisaun ida ba CEDAW iha Janeriu 2015.<sup>1</sup> Submisaun ne'e subliña violasaun direitus umanus boot no krime sira tuir lei internasional ne'ebé komite kontra feto no joven feto sira durante okupasaun Indonezia no referendu ba independensia, inklui violasaun (seksual), eskravidaun seksual, no forma violensia seksual sira seluk, hosi membru forsa defeza Indonezia no sira nia ema sira, nomós hosi Timor-oan rasik.

Komite CEDAW rekomenda iha sira nia Konkluzau Observasaun katak autoridade Timor-Leste tenke asegura katak la-ia impunidade ba krime sira violasaun seksual, eskravidaun seksual no forma violensia seksual sira seluk ne'ebé komete durante tempu okupasaun Indonezia. Aleinde ne'e, Komite husu ba Governu atu "implementa rekomendasaun sira hosi relatoriu Komisaun ba

---

<sup>1</sup> Amnesty International, 'Timor-Leste: Submisaun ba Komite Nasoins Unidas kona-ba Eliminasau Diskriminasaun hasoru Feto, Sesaun ba dala 62', 1 Janeiro 2015, Index: ASA 57/0001/2015

Akollamentu, Verdade no Rekonsiliaun (CAVR) nomos Komisaun ba Verdade no Amizade (CTF) relasiona ho reparasaun ba feto no joven feto sira ne'ebé sai vitima hosi violasaun durante okupasaun."

Komite CEDAW mós levanta preukupasaun katak sobreviventes sira hosi violensia seksual durante okupasaun Indonezia "kontinua esperensia estigmasaun sosial no ostrasismu tanba sente 'moe' no hetan asesu limitadu ba tratamentu mediku, psikolojiku, no servisu saúde no reproduitivu.

Amnesty International no Judicial System Monitoring Program konkorda ho Komite CEDAW ninia preukupasaun kona-ba adiamentu ba adopta lei sira relasiona ho Programa Nasional ba Reparasaun no Institutu Memoria Publiku, ne'ebe tama ona ba parlamentu desde 2010, no husu atu debate no aprova lei hirak ne'e tuir Konvensaun no padraun lei internasional sira seluk. Autoridade sira tenke mós fornese "programa reparasaun transformativa kompletu" ida atu rezolve diskriminasaun no violensia hasoru feto no joven feto sira.

Komite mós foti preukupasaun kona-ba diminuisaun ba rekursu umanus iha judisiariu depoisde Rezolusaun Parlamentu Nú.11/2014 no Rezolusaun Governu Nú. 20/2014 no Nú. 32/2014 iha Outobru 2014 no husu atu reeve fali. Rezolusaun hirak ne'e termina kontratu hotu no renovasaun kontratu ba autor judisiariu internasional sira, inklui juizes, prokuradores, defensores publiku no asesor internasional sira ho efeitu imediata, ne'ebé negativamente fo impaktu ba abilidade atu kontinua avansa prosesu sira. Tuir Lei Timor nian, julgamentu ba krime sira ne'ebé akontese durante 1999 rekere juis internasional nain rua. Depoisde terminasaun ba autor judisiariu internasional sira nia kontratu, julgamentu hanesan ne'e aktualmente imposivel atu akontese.

Amnesty International no Judicial System Monitoring Program ninia deklarasaun oral konjuta ba Sesaun ba dala 62 kona-ba CEDAW bele asesu liuhosi : <https://www.amnesty.org/en/documents/asa57/2833/2015/en/>

Komite CEDAW ninia Konkluzaun Observasaun bele asesu iha::

[http://tbinternet.ohchr.org/\\_layouts/treatybodyexternal/Download.aspx?symbolno=CEDAW%2fC%2fTLS%2fCO%2f2-3&Lang=en](http://tbinternet.ohchr.org/_layouts/treatybodyexternal/Download.aspx?symbolno=CEDAW%2fC%2fTLS%2fCO%2f2-3&Lang=en)